

SUNS EUROPE: UN FESTIVAL DI SUCÈS

Lu conferme ancje la atenzion dedicade de Rai, al dîs Torrenti. La gnove edizion si tignarà ancjemò a Udin, cuntune atenzion leade al turisim.

La edizion di **Suns Europe**, de Sierade **2015**, che si è tignude al “Giovanni da Udine”, e je stade un sucès. Devant di un Teatri jemplât dal dut, intal event finâl si son esibîts 10 grups musicâi in rapresentance di ancjetantis minorancis linguistichis stant che Suns Europe al è propit il “Festival european des arts performativis in lenghe minoritarie” (cine, leterature, poesie, teatri e musiche). Un **projet ambiziôs**, diret e coordinât di Radio Onde Furlane in continuitât cun Suns (nassût a Udin intal 2009) e che **al à vût za diviers ricognossiments europeans**, e tra chescj il patrocini dal Segretariât gjenerâl dal Consei di Europe e la marche “Effe” (Europe for Festivals, Festivals for Europe), assegnade aes manifestazions che si metin in lûs pe cualitât artistiche dal program e pal lôr impat significatîf a nivel locâl, nazionâl e internazionâl. Cumò **ARLeF e Regjon Fvj a lavorin par che il Festival al puedi rivâ a gnûfs travuarts**.

Il prin, al è chel di une plui grande visibilitât in graciis de realizazion dal documentari **di 40 minûts curât dal regist Marco D’Agostini**, za mandât in onde ai 9 di Març de Rai dal Trentino Alto Adige e che si podarà viodi, **Domenie ai 27 di Març, aes 10.20 cirche su Rai 3 FVJ** (cun repliche miercus ai 30 di Març, aes 21.30 cirche, su Rai 3 bis, canâl 103 dal digjitâl terestri).

«Un Festival come Suns Europe, dongje de promozion de diversitât culturâl, dai dirits linguistics, de creativitât e de colaborazion tra la nestre regjon e il rest di Europe, al vierç une strade gnove pe valorizazion in clâf turistiche dal teritori, propit tacant des sôs particolaritâts linguistichis e culturâls e, par chest, la Regjon e vûl confirmâ il sô sostegn lavorant in sinergie tra i diferents comparts» al dîs Gianni Torrenti, Assessôr Regjonâl pe Culture dal FVJ.

«Cun Suns Europe il Friûl al à mostrât il so profil plurilengâl e multicultural, cjapant dentri un public internazionâl zovin, curios e creatif che al rapresente il veicul miôr par tornâ a fâ florî lis sôs lidris e doprâ lis propriis lenghis intune otiche di viertidure, scambi, creativitât e modernitât. Dopo il sucès de edizion passade, la rêt e i contats internazionâi si son rinfuarçâts e ancje in Friûl e je une grande spiete. O sin za al lavôr par organizâ al miôr la edizion 2016», al zonte Lorenzo Fabbro, President de ARLeF.

1/2

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

Presentât di David Benvenuto, il documentari si môf cjatant i protagoniscj de manifestazion che, inte lôr lenghe mari, a contin la tiere di divignince e la emozion di cjatâsi a Udin par chest Festival internazionâl.

Dilunc de narazion a corin une daûr chê altre – dongje dal furlan - testimoneancis par catalan, ocitan, sart, baskiro, ladin e altris lenghis di minorance europeane, alternadis ai moments principâi dal spetacul finâl.

Tra i protagoniscj di rilêf: Itziar Ituno, atore intal cine basc “Loreak”, candidât de Spagne al premi Oscar 2015; Giovanna Marini, contestoriis di nomee internazionâl che e à di pôc puartât a teatri i viers in lenghe furlane di P. P. Pasolini; Fredo Valla, regjist e senegjatôr di Giorgio Diritti pal film “Il vento fa il suo giro”.

Udin, ai 24 di Març dal 2016

2/2

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

AGENZIE REGJONÂL PE LENGHE FURLANE - AGENZIA REGIONALE PER LA LINGUA FRIULANA - REGIONAL AGENCY FOR FRIULIAN LANGUAGE
Via della Prefettura, 13 - 33100 Udine / Udin Tel. +39 0432 555812 - Fax +39 0432 204158 - e-mail arlef@regione.fvg.it - www.arlef.it